

**SANEL MUŠOVIĆ**  
**DOM NARODA PARLAMENTA FBiH**  
**Delegat iz BPK Goražde**

Parlament Federacije Bosne i Hercegovine  
**DOM NARODA**  
SARAJEVO

|                        |      |         |            |
|------------------------|------|---------|------------|
| Prijelazno: 14-03-2017 |      |         |            |
| Org. jed.              | Broj | Priloga | Vrijednost |
| 02 -                   | 02 - | 948     | /16        |

907

**DOM NARODA PARLAMENTA FEDERACIJE BiH**  
**n/r gospođa Lidija Bradara, predsjedavajuća**

**Sarajevo, 13.03.2017. godine**

Na osnovu članova 177 i 178 Poslovnika o radu Doma naroda Parlamenta FBiH podnosim:

### **AMANDMAN**

Na Prijedlog zakona o izmjenama i dopunama Zakona o izvršenju krivičnih sankcija u FBiH

U članu 6 Prijedloga zakona o izmjenama i dopunama Zakona o izvršenju krivičnih sankcija u FBiH, a koji se tiče izmjena člana 232 Zakona o izvršenju krivičnih sankcija u FBiH, pored izmjena stavova 1, 5, 6 i 7, dodaje se i izmjena stava 4, koja glasi:

**U stavu 4, u trećem redu iza riječi „u Sarajevu“ umjesto teksta „sa odjeljenima u Ustikolini i općini Pale-Prača“, treba da stoji: „a odjeljenje pri Kazneno-popravnom zavodu Sarajevo u Ustikolini nastavlja sa radom kao Kazneno-popravni zavod poluotvorenog tipa u Foči u FBiH“.**

### **OBRAZLOŽENJE**

Nezavisna komisija Parlamentarne skupštine BiH za praćenje uslova boravka u zavodima, postupanje i poštivanje ljudskih prava lica nad kojima se izvršavaju krivične sankcije i druge mjere koje je izrekao u krivičnom postupku sud BiH je izvršila detaljnu kontrolnu posjetu 23.06.2014. godine Kazneno-popravnom zavodu Sarajevo, Odjeljenje Ustikolina i sačinila Izvještaj, broj: 05/6-50-13-31-41-6/14 od 21.07.2014. godine u kojem, kao prva Preporuka, stoji:

**„Preporučuje se Ministarstvu pravde FBiH da umjesto Odjeljenja u Ustikolini formira Kazneno-popravni zavod koji će imati posebnu zavodsku upravu, s obzirom da je ovo odjeljenje prilično udaljeno od Kazneno-popravnog zavoda u Sarajevu. Naime, Odjeljenje u Ustikolini po svom kapacitetu od 90 zatvorenika i infrastrukturi zadovoljava kriterije kazneno-popravnog zavoda...“.**

Odjeljenje Ustikolina (ranije Kantonalni zatvor Goražde) ušlo je u sastav KPZ Sarajevo početkom 2000. godine shodno Zakonu o izvršenju krivičnih sankcija u FBiH iz 1999. Godine. U toku 2009. godine zbog nedovoljnog smještajnog kapaciteta u KPZ Sarajevo u Sarajevu, tražila su se rješenja za proširenje kako bi se na izdržavanje kazne zatvora uputilo oko 400 osuđenih lica koja su na slobodi čekala izvršenje zatvorske kazne po pravosnažnim presudama Općinskih sudova u Sarajevu. U tom pravcu pokušavala su se iznaći rješenja za adekvatne lokacije za izgradnju ili ustupanje već postojećih objekata radi smještaja


osuđenika na području Kantona Sarajevo. Nažalost, i pored angažmana Ministarstva pravde i Vlade FBiH, do rješenja ovog problema nije se uspjelo doći, jer predstavnici vlasti u Kantonu Sarajevo nisu dali potrebne saglasnosti za ustupanje određenih objekata, niti dodjelili lokaciju za gradnju novih. U cilju prevazilaženja nastale situacije, predstavnici lokalne zajednice i tadašnje Vlade BPK Goražde, ponudili su saglasnost Ministarstvu pravde FBiH da na postojećem objektu Odjeljenja Ustikolina može vršiti proširenje kapaciteta u cilju smještaja osoba osuđenih od strane općinskih sudova u Sarajevu i Visokom. Prijedlog je bio prihvaćen i realizacija ovog projekta je bila okončana u maju 2010. Godine, a uloženo je oko 3 miliona KM.

Danas, nakon sedamnaest godina, sve ukazuje da su zadovoljeni svi uslovi da zatvor u Ustikolini može, po najvišim evropskim standardima, funkcionisati kao samostalni organ Uprave za izvršenje krivičnih sankcija u FBiH. Trenutna važeća sistematizacija radnih mjesta u Odjeljenju Ustikolina bi osamostaljivanjem pretrpila nevelike promjene.

Važno je istaći da od 2000. godine, od kada postoji muški zatvor u Ustikolini, nije zabilježen ni jedan ozbiljan incident, niti je narušena bezbjednost u ovoj lokalnoj zajednici i u BPK Goražde. Formiranjem posebne zavodske uprave u Foča u FBiH (Ustikolina) sigurno bi spriječili i nemile događaje, poput nedavne tragične saobraćajne nesreće u kojoj je jedno lice smrtno stradalo, a tri zatvorska policajca iz odjeljenja u Ustikolini su teško povrijeđena prilikom prevoženja u Sarajevo radi izvršenja svakodnevnih radnih obaveza i zadataka u Kazneno-popravnim zavodu Sarajevo.

NAPOMENA: Odjeljenje u općini Pale-Prača nije u funkciji i ne treba se spominjati u Zakonu.

**SANEL MUŠOVIĆ**



**delegat**